

**Komunikadu Imprensa
Tribunál Distritál Dili
29 Outubru 2021**

Tribunál no Prokuradór tenke konsidera faktu foun sira ne'ebé mosu durante produsaun ba prova

Tribunál no Prokurador tenke konsidera faktu foun sira ne'ebé mosu durante produsaun prova ba kazu sira bazeia ba artigu 275 Kódigu Prosesu Penál (KPP) kona-ba alterasaun substansiál, iha alinea (1) hateten katak kuandu iha produsaun ba prova faktu ne'ebé la tama iha akuzasaun mosu no halo arguidu hetan imputasaun kona-ba krime todan liu ka hasae pena aplikabel nia limite másimu, tribunál ofisiozamente ka tuir rekerimentu fó hatene ba ministériu públíku no defensór. Bainhira laiha akordu ruma atu hala'o julgamentu hamutuk ho faktu foun ka lae, presiza informa ba ministériu públíku nu'udar denúnsia ida atu hala'o prosedimentu kriminál kona-ba faktu foun ne'e (alinea 4).

JSMP husu ida ne'e relasiona ho kazu tentativa abuzu seksuál ida hasoru lezada ho idade tinan hitu ne'ebé Tribunál Distritál Dili julga iha loron 08 Outubru 2021. Durante prosesu julgamentu ba kazu ne'e mosu faktu foun husi lezada nia deklarasaun katak arguidu ninia aktu la'os halo de'it ba lezada maibé halo mós ba lezada nia alin feto ne'ebé iha momentu ne'ebá asiste arguidu ninia aktu ne'ebé nia halo hasoru lezada. Mezmu mosu faktu foun ne'e maibé tribunál kontinua hala'o prosesu julgamentu sein husu ministériu públíku no defeza nia hanoin kona-ba faktu foun ne'e. Kazu ne'e prokuradór akuza arguidu kontra artigu 23 KP no artigu 177 alinea 2 KP kona-ba tentativa abuzu seksuál ba menór ho moldura penal tinan 5 to'o tinan 15 prizaun.

"Bazeia ba artigu 275 KPP, bainhira mosu faktu foun durante produsaun ba prova, tribunál tenke husu ministériu públíku no defeza nia hanoin ba faktu foun ne'e, serake hala'o julgamentu hamutuk ho faktu foun ka ketak. Maibé iha kazu konkretu tribunál la halo ida ne'e, nune'e JSMP konsidera tribunál inklui ministeriu publiku la analiza didi'ak kazu ne'e inklui la konsidera katak krime envolve labarik sira liuliu krime ho natureza violensia seksual nu'udar kazu sériu. Tanba JSMP fiar katak bainhira ministériu públíku

Rua Beco Lakateu, Aldeia Manu fuik,
Suku Colmera, Administrativu Vera Cruz

Dili Timor Leste

PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

no tribunál analiza didi'ak kazu sira maka desizaun sira sei justu tuir gravidade husi kazu refere", dehan Sra. Ana Paula Marçal, Diretora Ezekutiva JSMP.

Iha prosesu julgamentu ne'e, arguidu konfesa faktu hotu no deklara tan katak nia halo aktu ne'e dala tolu ona hasoru lezada. Alende ne'e, lezada kontinua konfirma faktu sira iha akuzasaun inklui deklara katak arguidu halo mós abuzu seksuál hasoru lezada nia alin.

Iha alegasaun, prokuradór konsidera arguidu pertuba lezada nia psikólojia no arguidu presiza hetan tratamentu ba nia mentalidade tanba gosta ho labarik ki'ik. Nune'e ministériu públiku husu ba tribunál atu kondena arguidu ho pena prizaun tinan 18. Entretantu defeza haktuir katak arguidu nia aktu ne'e hasoru labarik ki'ik oan, nune'e defeza laiha liafuan atu ko'alia no entrega ba tribunál atu deside pena ne'ebé justu.

Depoisde avalia faktu hotu, tribunál prova katak arguidu provadu komete duni krime tentativa abuzu seksuál hasoru lezada. Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, ho nune'e tribunál konklui prosesu ne'e no kondena arguidu ho pena prizaun tinan 8 (ulu).

JSMP fiar katak bainhira prokuradór no tribunál analiza klean faktu sira, aplika pena ne'ebé appropriadu no konsidera kualkér forma krime abuzu seksuál hasoru labarik nu'udar krime sériu sei lori rezultadu pozitivu ba prevensaun.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl